

Date – 16/04/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Home Minister Pu K Sapdangan Mizoram leh Assam ramri chungchangah ramri him tak, mipuite thlamuang taka an khawsak theihna tur nawr chhuah chu an thupui ber a ni ang a ti.
2. Mizo Zirlai Pawl chuan Phuldungsei Thaidawr Tlanga Tripura sorkar hmalakna chu a rang lama ti tawp tura hriattir turin Mizoram sorkar a ngen.
3. External Affairs Minister Dr.S.Jaishankar-a chuan hmarchhak chu ramrin policy a neih hrang hrangah a pawimawh lai luahtu an ni a ti.
4. India-in rampawna bungrua leh hnathawk a thawncchhuah zat chu zaa 5.5 in a pung.

<><><>

MIZORAM STATE BOUNDARY COMT

Tun thla ni 25 a Guwahati, Assam-a Mizoram leh Assam State Secretary-level meeting neih tur chungchang thlirhovin vawiin khan Mizoram State Boundary Committee chu an Chairman, Home Minister Pu K. Sapdanga hovin an thukhawm a,

Thutkhawmah hian Home Minister chuan ramri him tak, mipuite thlamuang taka an khawsak theihna tur nawr chhuah chu an thupui ber a nih thu a sawi a. Mizoram tana channa awm lo tura theihtawp chhuah a nih thu sawiin Mizoram leh Assam ramri zirchiang tur Study Group member 4 awmna pawh kumin January ni 25 khan din a nih thu sawiin, he Study Group hian chhuanawm takin hma an lak thu leh, anni zarah document tan chhan tur pawh an nei tha tawh hlea an inhriat thu a sawi a. Mizoram aiawha ramri chungchang inbiakna a palai kalturte pawh an inpuahchahna a tha thawkhata a hriat thu sawiin, Mizoram tan theihtawp chhuah turin a fuih a ni.

Mizoram sawrkar atanga thu ken turte leh pawimawh dang chi hrang hrang he thutkhawmah hian sawiho a ni a. Mizoram – Assam State Secretary-level meeting-ah hian Mizoram sawrkar chuan Home Secretary Pu Vanlalmawia hovin palai mi 7 a tir dawn a ni.

Boundary Committee thutkhawm hmasa ber hi kum 2021 July ni 30 khan neih a ni a. Thutkhawm vawi 2-na hi kum 2021 September ni 7 khan neih niin a vawi 3-na chu kum 2021 November ni 17 khan neih a ni a. A vawi 4-na chu kum 2022 September ni 9 ah neih niin, a vawi 5-na hi kum 2023 January ni 20 khan neih a ni a, a vawi 6-na chu nikum January 25 khan neih a ni leh a. Tun tum hi Mizoram sawrkar thar a pian hnua thutkhawm vawi 2-na a ni.

<><><>

AMECC

All Mizoram CSS Employees Co-ordination Committee (AMCECC) ten sorkara an thilphut nawr nana ni 3 chhung hnathawh an chawlhsan ni 2 na vawiin thleng khan sorkar nen inbiakna an nei lova, lungawilohna lantir chhunzawm zel an tum thu an sawi.

AMCECC Chairman Pu Malsawmtluanga Hauhnar chuan pen down strike an neih mekah sorkar nena an la inbiak rih loh thu leh inbiak duha an ko a nih chuan an inpeih reng thu a sawi.

AMCECC lungawilohna lantir avang hian Education depts hnuaiha school 400 chuanga zirna kalpui theih a ni lo tih AMCECC Chairman chuan sawiin naupang ten mid day meal an dawn theih loh bakah lehkhahu sem leh zirna kaihhnawih dang pawh engmah kalpui theih a ni lo an ti a.

Hei bakah hian Ni 100 inhlawnhna khawi khuaah mah kalpui theih a ni lo a, UD&PA hnuaiha PMAY (U) insak tanpuina dawng tur survey neih mek chu chhunzawm theih a ni lo tih sawiin hun bituk chhung nei survey neih tur, a hun tak a zawh theih dawn loh avang hian khawpui a cheng mi harsa ten insak tanpuina dawng awm tak tak in an dawn loh phah thei dawn tih an sawi a.

Health Dept hnuaiha Damdawiin hrang hrangah te emergency bak damlo in entir theih a nih loh thu leh sawrkar pisa hrang hrang, CSS hnathawk te tam naah chuan hna mumal thawh theih a ni lo an ti a. Mizoram sawrkar hnuaiha hian CSS ten hna pawimawh an thawk nasa hle tih sawiin vawiinah pawh hian office hna thawk mumal thei lo an tam hle tih an sawi a ni.

Kolasib District ah pawh hmun dang rualin nimin atang khan sorkara an thil phut kar nana Pen down Strike chu CSS Employees tenj an kalpui chhunzawm a, Kolasib District chhungah AMCECC member 1200 chuanga an awm niin thudawnna chuan a sawi a. An member zingah hian Zirna In hrang hranga thawk zirtirtu (Samagra Shiksha hnuaiha thawktu) an tam ber a, anni bakah hian Health & Family Welfare Department leh Department danga thawk an awm ani.

Puan tawh angin, CSS employees nawrh chungchangah hian Chief Secretary charge la mek tu Pu H. Lalengmawia'n Centrally Sponsored Scheme hnuaiha thawk te chu dik leh mumal taka lak an awm loh avangin dah ngheh theih an nilo a ti a.

Nimin khan Aizawla thuthar thehdarhtute kawmin Pu Lalengmawia chuan CSS hnathawkte chu DPC kaltlanga lak an nih loh bakah induhsakna avanga hna inpek a tam hle a ti a, lak dan mumal lo taka lak an nih avangin seniority list pawh an nei hleithei lo tih sawiin NHM leh SSA thawktu zingah an tam zual a ti a, CSS Regularisation Scheme kalpui tura thil tul leh pawimawh tak chu inter seniority niin hei hi tihfel a harsat dawn avang leh mumal lo taka thil a kal tam tawh avangin CSS Regularisation Scheme chu kalpui theih a nilo a ti a, India danpui hnuaiha Article 14 leh Article 16 an bawhchhe thiango tih sawiin dan anga lak loh ten an hmang ve theilo tih a sawi.

<><><>

MZP

Mizo Zirlai Pawl chuan Phuldungsei Thaidawr Tlanga Tripura sorkar hmalakna chu a rang lama ti tawp tura hriattir turin a Mizoram sorkar a ngen.

MZP hruiatute chuan Thaidawr tlang, Phuldungsei Mizoram chhunga Tripura sawrkar-in kut an thlakna hmun hi vawiin khan an tlawh a, helai

hmun a hmalakna zawng zawng hi ti tawp nghal turin a hmun a hnathawktute an hriattir a. Mizoram sawrkarin Thaidawrtlang panna kawng link road laih tlang pawh sawrkar hian ngaihven zui nghal vat turin MZP chuan a ngen a ni.

He hunah hian, Phuldungsei Village Council hruaitute leh Mizo Convention: Youth Wing, Jampui Hills te'n MZP hruaitute hi an tawiawm a ni.

MZP President Pu H. Lalthianghlma chuan Tripura sawrkarin kut a rawn thlakna Phuldungsei Jampui Hills khuaa Thaidawr tlang chu 1933 Regulation ah Mizoram ramchhung a nihna chiang takin a lang a ti a, chak taka hma la turin Mizoram sawrkar an phut tih a sawi a, Thaidawr tlang ah tun hma in Mizoram sawrkarin kawng alo lai tawh thin a ti a, tun hnaiah hmalakna a awm tak loh avangin Tripura sawrkar an rawn che ta nia ngaih theih anih thu leh ration card paihsak an awm vang te a ni thei tih sawiin Mizoram lam chet lak ve vat a ngaih thu a sawi.

Tun hnaia Assembly thutkhawmah Hachhek bialtu MLA Pu Robert Romawia Royte chuan Phuldungsei khuaa mi 85 te Ration Card paih sak an nih chungchang hi a sawi chhuak a, Supply Minister Pu B. Lalchhanzova chuan mi 85 te chu Tripura lama Aadhar ah ziahluh an lo nih tawh vang leh dan angin ram pumah mi pakhatin ration card pakhat aia tam a nei thei loh avangin Mizoram lama an hming chu khawl hmanga paih a ni tih a sawi a, chhungkaw 21 a member 85 te chu Mizoram sorkar chuan khua leh tui humhim nan Manual Ration Card siam sakin, AAY quota angin thla tin buhfai KG 35 pek thin an ni tih a sawi a ni.

Environment, Forest & Climate Change Minister Pu Lalthansanga chuan nimin khan Thaidawr tlang hi tlawhin Hma an lakna hmun nia an sawi chu tun hma atanga Mizo lal te luah ram leh thuthmun a nih thu sawiin a hmun enkawl leh tuaihnum kawngah an lo muthlu rei hle a ni tih Mizo Convention hruaitute nen an inkawmna atangin a lang tih a sawi bawk.

<><><>

SERCHHIP

Govt Serchhip College Student Union ten zirtirtu nghet pek an phut avanga lungawilohna lantira vawiina an college campus chhunga kawng pawimawh an dan chu sorkar atanga thutiam an hmuh avangin reiloteah an ti tawp nghal a,

Kan corr thudawn danin, SU thilphut chungchangah hian Serchhip MZP chuan School Education Minister Dr Vanlalhlana an bia a, Minister hian Chief Minister rawtna anga Academic Session chhunga Transfer Period siam an tum tawh loh thu leh College exam a hun chho mai dawn a, Exam zawh veleh Govt Serchhip College SU te thil beisei chu tihhlawhlin a nih theihnan a theih anga hmalak a tum thu a sawi a, hemi hnu hian kawngpui dan pawh an tawp zui nghal a ni.

Chief Minister Pu Lalduhoma'n a lo tiam Geography Deptt ah zirtirtu nghet 2, Zoology Deptt ah a nghet 1 leh nghet lo 1 leh BCA Deptt ah a nghetlo pakhat dah chu tihhlawhtlin phutin Students Union hian sorkar an kar a ni.

<><><>

MIZORAM NGO REPS IN DELHI

Mizoram tlawmngai pawl hrang hrang aiawh te chuan nimin tlai khan Union Home Secretary Pu Govin Mohan hmu in Myanmar nena zalen taka ramri-a inkalpawhna tihtawp chungchang leh ramri hung chungchang an sawipui.

Union Home Secretary chuan, Mizoram leh Myanmar inkar hung tura hmalaknaah Mizoram tlawmngai pawl te thlawpna an beisei tih sawiin dodal lo hram turin a lo ngen a. Thutkhawma tel NGO hruihlo chuan, Free Movement Regime leh Ramri hung chungchângah tlawmngai pawl intelkhawm NGO Co-Ordination Committee anga ngaihdan awmsa an sawi a, Home Secretary hnenah a tul anga ram mipuite ngaihdan leh duhdan ngaipawimawh thiam turin an ngen a ni.

NGO hruihlo chuan Union Home Minister Aizawl a alo zin laia a sawi, Lengpui Airport, Airport Authority of India (AAI) kuta hlan chungchang hmalak tawh dan an zawt a. Mizoram a ruihhlo hluar lutuk chungchang leh Mizorama rampawn lam mi luh phalna Protected Area Regime chungchang leh pawl hrang hrang hmachhawpte an sawi nawn bawk a ni.

Union Home Secretary chuan, Lengpui Airport chu Mizo mipuite duh dan anga AAI kuta hlan tura an lo sawi tawh angin, hma an lak mek thu a sawi a. Mizoram Chief Secretary chu proposal siam a, a rang lama thehlut tura an hriattîr tawh thu a sawi a, an intiam tawh anga thla thum chhung ngeia hma an lak hman tur thu a sawi. Ruihhlo chungchângah Union Home Secretary chuan, Mizoram a ruihhlo hluar lutuk a vei thu leh, Mizo mipui ten nasa taka an do chu lawmawm a tih chu sawiin, sum leh pai leh hmanrua a tul apiang hemi kawnga hmalatute an puih tur thu a sawi a. Narcotics Control Bureau (NCB) kaltlanga an puih tur thu a sawi a ni.

Home Secretary chuan Mizoram luh phalna Protected Area Regime awlsam zawka lak a nih theih nan ruahmanna a lo siam nghal tur thu leh a enzui turin Intelligence Bureau Joint Secretary (NE) a ruat nghal a. Heng bakah hian, Mizoram tana hmasawna tur hrang hrang Home Secretary hi an sawipui bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

EXPORT

India-in rampawna bungrua leh hnathawk a thawnychhuah zat chu zaa 5.5 in a pung a. Khawvel sum dinhmun nghet lo tak karah Kum 2024-25 chhugnin dollar tluklehdingawn 820.93 hu a thawnychhuak a ni.

Union Ministry of Commerce and Industry tarlan danin kum 2024-25 chhung vek hian ramdang atanga thil lakluh hi dollar tluklehdingawn 915.19 hu a ni a. Thawnychhuah leh lakluh inthlauhna hi dollar tluklehdingawn 21.54 a ni.

<><><>

EAM

External Affairs Minister Dr.S.Jaishankar-a chuan hmarchhak chu ramin policy a neih hrang hrangah a pawimawh lai luahtu an ni a ti. North East Investors Summit 2025 palaite hmaah he thu hi sawiin Pu Jaishankar-a chuan sawrkar policy Neighbourhood First, Act East leh BIMNSTEC ahte hun hmarchhakte an pawimawh em em a ni a ti a.He summit a lo kal ramdang mite chu hmarchhaka theihna awmte hmuchhuak a, an sawrkar leh industry lamahte thehlar turin a chah a ni.

North East Investors Summit 2025 hi Union Ministry of Development of North Eastern Region (DoNER) buatsaih a ni.

<><><>